

文獻通考

二百七十九卷八十

象緯考

一	本	漢
四	〇	書
冊	二	門
架	函	類
冊	號	類

庫	文	閣	內
五	〇	〇	〇
九	〇	〇	〇
架	冊	號	類
冊	號	類	漢書

內閣文庫	番號	漢	600
	冊數	140	(113)
	函號	294	6

廿百四十



天獻

通考卷之二百七十九

淺草文庫

鄱陽馬端臨貴與著

象緯考

蒼龍七宿

宋中興天文志石氏云東宮青帝其精蒼龍為

七宿其象有角有元有氏有房有心有尾有箕

氏胸房腹箕所糞也司春司木司東嶽司東方


司鱗蟲三百有六十蒼龍為鱗蟲之長

角兩星南北正直著中有平道上天田摠是黑星

兩相連別有一鳥名進賢平道右畔獨淵然最上

三星周鼎形角下天門左平星雙雙橫於庫樓上

庫樓十星屈曲明樓中柱有十五星三三相著如



鼎形其中四星別名衡南門樓外兩星橫

角二星十二度為主造化萬物布君之威信謂
之天闕其間天門者其內天庭也故黃道經其
中七曜之所行也其明則太平芒動則國不寧
日食右角國不寧月食左角天下道斷金火犯
有戰敵金守之大將持政左角為天田為理主
刑其南為太陽道五星犯之為旱右角為將主
兵其北為太陰道五星犯之為水蓋天之三門
猶房之四表也左右角間二星曰平道為天子
八達之衢明正則吉動搖則法駕有虞天田主
天子畿內封疆金守之主兵火守之主旱水守
之主潦平道西一星曰進賢在太微宮東明則

賢者在位暗則在野又曰主卿相主逸才周鼎
三星在攝提西國之神器也不見或移徙則運
祚不寧天門二黑星在平星北角之南主天之
門為朝聘待客之所明則四方歸化不見則兵
革起邪佞生平星二星在庫樓北平天下之法
獄廷尉之象也庫樓十星其六大星為庫南四
星為樓在角南一曰天庫兵車之府也旁十五
星三三而聚者柱也中央四小星衡也主陳兵
其占曰庫中星不見兵四合無星則下臣謀上
明而動搖則兵出四方盡不見則國無君庫樓
東北二星曰陽門主守隘塞也南門二星在庫
樓南天之外門也主守兵明則遠方入貢暗則

夷狄畔客星守之至兵至

宋兩朝天文志角二星距南星去極九十七度
半 庫樓二星距西北星去極一百二十三度
入軫十五度半 南門二星距西星去極一百
三十七度入軫十一度 平道二星距東星去
極九十一度入角二度 天門二星距西星去
極一百四度半入軫十六度 平星二星距西
星去極一百九度半入軫十六度 天田二星
距西星去極八十二度半入角二度半 周鼎
三星距東北星去極六十四度半入角宿七度
半

元四星恰似彎弓狀大角一星直上明折威七子

元下橫大角左右攝提星三三相似如鼎形折威
下左頓頑星兩箇斜安黃色精頑下二星號陽門
色若頓頑直下存

元四星九度日月之中道主天子內朝天下之
禮法也又曰摠攝天下奏事聽訟理獄錄功者
也亦為疏廟主疾疫其星明大四海歸王輔臣
納忠人無疾疫移動多病不見則天下鼎沸而
旱澇作矣大角一星在攝提間天王坐也又為
天子梁棟金守之則兵起日食主凶元南七黑
星曰折威主斬殺金火守之夷狄犯邊將有棄
市者攝提六星直斗柄之南主建時節伺機祥
攝提為盾以夾擁帝坐也主九卿明大三公恣

橫客星入之聖人受制一曰大臣之象頓頑二
星在折威東南主考囚察情偽也陽門在庫樓
東北主邊塞險阻之地客星出陽門夷狄犯邊
宋兩朝天文志元四星距南第二星去極九十
六度攝提六星其右距北大星去極六十七度
入元七度其左距南星去極七十二度半入元
七度 太陽門二星距西星去極一百一十三
度入角十度 折威七星距西第三大星去極
一百三度入元三度 大角一星去極六十六
度入元二度半 頓頑二星距東南 去極一
百一十二度半入元四度
氏四星似斗側量米天乳氏上黑一星世人不識

稱無名一箇招搖梗河上梗河橫列三星狀帝席
三黑河之西元池六星近攝提氏下衆星騎官出
騎官之衆二十七三三相連十欠一陣車氏下騎
官次騎官下三車騎位天輻兩星立陣傍將軍陣
裏振威霜

氏十六度下二尺為五星日月中道為天子之
路寢明則大臣妃后奉君不失節如不見或移
動則臣將謀內禍亂生矣日月食主內亂木犯
之立妃后火犯臣僭上金犯拜將水犯百官憂
客星犯婚禮不整彗孛犯暴兵起月暈人不安
一曰氏為后妃之府休解之房前二星適也後
三星妾也將有徭役之事氏先動星明大則民

無勞天乳在氏北主甘露明則潤澤甘露降招
搖一星在梗河北次北斗柄端主胡兵芒角變
色搖動則兵革大起梗河二星在大角北天子
以備不虞其色變動有兵喪帝席三星在大角
西北天子燕樂獻壽之所其星不見大人失位
元池六黑星為泛舟楫主延送移徙則凶騎官
二十七星在氏南天子騎士之象星衆則安不
見兵起車騎三黑星在氏西騎官之上都車馬
之將也金火犯為災動搖車騎行天輻兩黃星
在房西主鸞駕客星來守之則輦轂有憂也騎
陣將軍一星在騎官東南主騎將也搖動則騎
將出

宋兩朝天文志氏四星距西南星去極一百四
度半元池六星距北大星去極七十度半入元
三度天乳一星去極九十二度入氏十四度
招搖一星去極五十一度入元四度半梗河
三星距大星去極五十九度入氏二度騎官
二十七星距西北星去極一百二十度入氏宿
初度車騎三星距東南星去極一百四十度
入氏二度帝席三星距東星去極六十七度
半入氏宿一度半

房四星直下主明堂鍵閉一黃斜向上鉤鈴兩箇
近其傍罰有三星直鍵上兩咸夾罰似房狀房下
一星號為日從官兩箇日下出

房六度為明堂天子布政之宮也亦四輔也下
第四星上將也次次將也次次相也上星上相
也南二星君位北二星夫人位又為四表中間
為天衢之大道亦謂之天關黃道之所經也南
間曰陽環亦曰陽道其南曰太陽北間曰陰間
亦曰陰道其北曰太陰七曜由乎天衢則天下
平和由陽道則主旱喪由陰道則主水兵房星
亦曰天駟為天馬主車駕南星曰左驂次左服
次右服次右驂亦曰天廐又主開閉為蓄藏之
所由也房星明則王者明驂星大則兵起星離
則人流日月食主昏亂權臣橫彗孛犯之兵起
下二星為陰五星犯之為水上二星為陽五星

犯之為旱房北二小星曰鉤鈐房之鈐鍵天之
管籥主閉藏鍵天心也王者孝則鉤鈐明近房
天下同心遠則天下不和王者絕後房鉤鈐間
有星及踈拆則地動河清東咸西咸各四星在
房心北日月五星之道也為房之戶所以防淫
佚也明則吉暗則凶日月五星犯守之有陰謀
火守之兵起罰三星在東咸正西南北而列主
受金贖罪正而列則法令太平曲而斜行則刑
罰不中日一星在房中道前太陽之精主明德
金火犯守之有憂從官二星在積卒西北
宋兩朝天文志房四星距南第二星去極一百
一十四度半 鍵閉一星去極一百八度入房

四度 罰三星距南星去極一百八度入心一
度半 東咸四星距西南星去極一百一十一
度入心一度 日一星去極一百一十三度入
心十四度半 從官二星距西星去極一百二
十二度入心十四度 西咸四星距西南星去
極一百四度半入心十五度 鈎鈐二小星去
極一百九度半入房二度半
中興天文志甘氏云日一星在房之西氏之東
日者陽宗之精也為鷄三足為鳥二足鷄在日
中而鳥之精為星以司太陽之行度日生於東
故於是在焉
心三星中央色最深下有積卒共十二三三相聚

心下是

心六度一名大火天王位也中星曰明堂為大
辰天子之正位也前星為太子不明則太子不
得位後星為庶子明則庶子繼心上四尺為日
月五星之中道中心明則化成道昌直則地動
移徙不見國亡又曰心變黑色大人有憂直則
王失勢動則國有憂離則民流金火犯血光不
止土木犯吉日月食吉月暈兵起火來守之國
無主客星及孛犯天下兵荒積卒十二星在房
心西南五營軍士也微而小則吉明大搖動兵
大起一星亡兵出二星亡兵半出三星亡兵出
盡他星守之兵大起近臣誅

宋兩朝志心三星距西前星去極一百一十四度半積卒十二星距大星去極一百二十六度半入氐宿十五度

尾九星如鈎蒼龍尾下頭五點號龜星尾上天江四橫是尾東一箇名傳說傳說東畔一魚子龜西一室是神宮所以列在后妃中

尾十九度后妃之府後宮之場也北之一丈為天之中道上第一星后也次三星夫人次則嬪妾第三星傍一星名曰神宮解衣之內室尾亦為九子星色欲均明大小相承則后妃無妬忌後宮有叙多子孫星微細暗后有憂疾踈遠則后失勢動移則君臣不和天下亂就聚則大水

木犯之及月暈則后妃死火犯宮中內亂土犯吉水犯宮中事客星犯大臣誅日月食主飢一曰金火守之後宮兵起龜五星在尾南漢中主占定吉凶明則君臣和不明則為乖戾亡則赤地千里火守之兵起在外守之兵罷天江四星在尾之北主天陰不欲明明而動水暴出參差則馬貴其星不具則津河關道不通熒惑守之有立主客星入河津絕傳說一星在尾後河中主後宮女巫祝祀神靈祈禱子孕故曰主王后之內祭祀以求子孫詩云克禋克祀以弗無子此之象也其明星大王者多子孫小而暗後宮少子動搖則後宮不安星搖則天子無嗣魚

一星在尾後河中主陰事知雲雨之期也大明
則陰陽和風雨時暗則魚多亡動搖則大水暴
出漢中則大魚多死火守在南則旱在北則水
起
宋兩朝天文志尾九星去極一百二十七度半
龜五星距南第二星去極一百一十四度半入
尾宿十度 魚一星去極一百二十六度入尾
宿十五度半 傳說一星去極一百八度半入
尾宿十四度

中興天文志石氏云傳說者章祝女巫巫官一名
太祝司天王之內祭祀以祈子孫故有太祝以
傳說於神宮或讀傳為傳遂謂之既相說自莊

周妄言

夾漈鄭氏曰按傳說一星惟主後宮女巫禱
祠求子之事謂之傳說者古有傳母有保母
傳而說者謂傳母喜之也今之婦人求子皆
祀婆神此傳說之義也偶商之傳說與此同
音諸子家更不詳審其義則曰傳說騎箕尾
鬲去殊不知箕尾專主後宮之事故有傳說
之佐焉

按傳說商之良宰輔也而其星則所主者
宮中禱祠以祈子孫其事不類故先儒疑
之然諸星中所謂軒轅社稷造父冥仲王
良皆古人之名也蓋在天為星辰在人為

聖賢於理有之今疑其不類而改以為傳
說則過矣

箕四星形狀如簸箕箕下三星名木杵箕前一黑
是糠皮

箕十一度亦謂之天津後宮妃后之位上六尺
為天之中道箕一曰天雞主八風凡日月宿在
箕東辟翼軫者風起又主口舌主客蠻夷胡貊
故蠻夷將動先表箕焉星大明直則五穀熟君
無讒間踈暗則無君世亂五穀貴蠻夷不伏內
外有差就聚細微天下憂動則蠻夷有使來離
徙則人流若移入河國災人相食月暈金火犯
之兵起流星犯大臣叛日宿其野風起杵三星

在箕南主杵曰之用也縱為豐橫為飢移徙人
失業不見人相食客星入杵曰天下有急變糠
一星在箕口前杵曰西北明則為豐暗為飢不
見人相食

宋兩朝天文志箕四星距西北星去極一百二
十一度半 杵三星距中心大星去極一百三
十八度入箕宿三度 糠一星去極一百一十
七度半入尾宿十七度半

北方 玄武七宿

宋中興志石氏云北方黑帝其精玄武為七宿
斗有龜蛇蟠結之象牛蛇象女龜象虛危室辟
皆龜蛇蟠蚪之象司冬司水司北嶽司北方司

介蟲三百有六十王奕曰龜不獨介蟲之長也
北冬令其氣蟄藏有縮藏之象焉

斗六星其狀似北斗魁上建星三相對天弁建上
三三九斗下圓安十四星雖然名鼈貫索形天鷄
建背雙黑星天籥柄前八黃精狗國四方鷄下生
天淵十星鼈東邊更有兩狗斗魁前農家丈人狗
下眠天淵十黃狗色玄

斗二十五度天廟也亦曰天機五星貫中日月
正道為丞相太宰之位酌量政事之宜褒進賢
良稟授爵祿又主兵南二星魁天梁也中央二
星天相也北二星天府庭也亦為壽命之期將
有天子之事占於南斗星盛明君臣一心天下

和平爵祿行芒角動搖天子愁兵起移徙其臣
逐日月五星逆入斗天下流蕩李犯之兵起星

小暗則廢宰相及死鼈十四星在南斗南鱉為

水蟲歸太陰有星守之白衣會主建六星在斗

背亦曰天期臨於黃道天之都關也建斗之間

七曜之道建為謀事為天鼓為天馬南二星天

庫也中央二星市也鈇鎖也上二星旗跗也建

動搖則人勞月暈之蛟龍見牛馬疫月食十星

犯守大臣相譖臣謀主亦為閔梁不通有大水

天弁九星在建星北入市官之長也主列肆闌

闐若市籍之事以知市珎也星明則吉彗星犯

守之糴貴兵起天鷄二星在狗國北主候時也

金火守入兵大起天籥八星在斗南斗杓西主
鎖籥關閉明吉暗凶狗國四星在建東北主鮮
卑烏丸沃沮明則邊寇作金火犯守外夷有變
太白逆守其國亂客星守犯之有大盜其王且
來天淵十星在鬻東南一曰天海主漑灌火守
之大旱水守之大水一曰主海中魚鬻狗二黑
星在斗魁前主吠守防奸回也不居常處為大
災農丈人一星在南斗西南老農主稼穡也其
占與糠略同

宋兩朝志南斗六星距西第三星去極一百一
十九度鬻十四星距東大星去極一百三十
度入斗五度天弁九星距西大星去極九十

九度半入斗宿初度 建六星距西星去極一
百一十三度入斗宿四度 天籥八星距西大
星去極一百一十四度半入尾宿十九度 狗
二星距東大星去極一百一十八度入斗宿十
二度 天淵十星距中北星去極一百二十九
度入斗宿十七度 天鷄二星距西星去極一
百一十度入斗宿十六度半 狗國四星距西
北星去極一百二十度入斗宿十八度 農丈
人一星去極一百二十四度半入箕宿六度半
牛六星近在河岸頭頭上雖然有兩角腹下從來
欠一脚牛下九黑是天田田下三三九坎連牛上
直建三河鼓鼓上三星號織女左旗右旗各九星

河鼓兩畔右邊明更有四黃名天桴河鼓直下如
連珠羅堰三烏牛東居漸臺四星似口形輦道東
足連五丁輦道漸臺在何許欲得見時近織女
牛七度天之關梁日月五星之中道主犧牲其
北二星一曰即路二曰聚火又曰上一星主道
路次二星主關梁次三星主南越廿氏曰上一
星主道路次二星主關梁次二星主南夷中一
星主牛移動則牛多殃明大則王道昌其星曲
則糴貴又曰星明大則關梁通牛貴怒則馬貴
不明失常穀不登細則牛賤中星移上下牛多
死小星亡則牛多疫月暈損犢金火犯之兵災
水土犯之吉天田九星牽牛南太微東主天子

畿內之田其占與角之天田同九坎九黑星在
天田東主溝渠所以導達泉源流瀉盈溢明盛
則有灾夷狄侵邊不明則吉河鼓三星在牽牛
北天鼓也主軍鼓及鈇鉞一曰三武主天子三
將軍中央大星為大將軍左星為左將軍右星
為右將軍左星南星也所以備關梁設險阻而
拒難也明大光潤將軍吉動搖差度亂兵起直
則將有功曲則將失律右旗左旗各九星在河
鼓左右皆天之旗鼓也旗星明潤將軍吉動搖
兵起怒則馬貴旗端四星南北列曰天桴鼓桴
也星不明漏刻失時動搖軍鼓用桴鼓相直亦
然織女三星在河北天紀東端天女也主果蓏

絲綿寶玉也王者至孝神祇咸喜則織女星俱
明天下和平大星怒角布帛貴又曰三星俱明
女功善暗而微天下女功廢不見兵起東足四
星曰漸臺臨水之臺也主漏刻律呂之事西足
五星曰輦道天子嬉遊之道金火守之御路兵
起羅堰三星在牽牛東主堤塘壅蓄水潦灌溉
田苗大而明大水泛溢

宋兩朝天文志牛六星距中央大星去極一百
八度半 天田九星距西北星去極一百一十
六度半入斗宿二十二度 九坎九星距大星
去極一百四十一度半入斗宿二十五度 左
旗九星距西第四大星去極七十三度半入斗

宿二十四度 天桴四星距大星去極九十四
度入斗宿二十四度半 羅堰三星距北星去
極一十九度入牛宿四度 漸臺四星距東南
去極五十八度入斗宿十度 輦道五星距西
北星去極四十七度半入斗宿十一度半 織
女三星距大星去極五十二度半入斗宿五度
夾漈鄭氏曰按張衡云牽牛織女七月七日
相見者即此也古雅云河鼓謂之牽牛又歌
曰東飛百勞西飛燕黃姑織女時相見黃姑
即河鼓也音訛耳

容齋洪氏隨筆曰宋蒼梧王當七夕夜令楊
王夫伺織女渡河曰見當報我不見當殺汝

錢希白洞微志載蘇德哥為徐肇祀其先人
曰當夜半可以蓋候鬼宿渡河之後翟公巽
作祭儀十卷云或祭於春或祭於旦皆非是
當以鬼宿渡河為候而鬼宿渡河常在中夜
必使仰占以候之葉少蘊云公巽博學多聞
援證皆有据不肯碌碌同衆所見必過人予
按天下經星終古不動鬼宿隨天西行春昏
見於南夏晨見於東秋夜半見於東冬昏見
於東安有所謂渡河及常在中夜之理織女
昏晨與鬼宿正相反其理則同蒼梧王荒悖
小兒不足笑錢翟葉三公皆名儒碩學亦不
深攷如此杜詩云牛女漫愁思秋期猶渡河

牛女年年渡何曾風浪生梁劉孝儀詩云欲
待黃昏至含嬌淺渡河唐人七夕詩皆有此
說此自是牽俗遣詞之過故杜老又有詩云
牽牛出河西織女處其東萬古永相望七夕
誰見同神光竟難候此事終朦朧蓋自洞曉
其實非他人比也

女四星如箕主嫁娶十二諸國在下陳先從越國
向東論東西兩周次二秦雍州南下雙鴈門代國
向西一晉伸韓魏各一晉北輪楚之一國魏西屯
楚城南畔獨燕軍燕西一郡是齊隣齊北兩邑平
原君欲知鄭在越下存十六黃星細區分五箇離
珠女上星敗瓜珠上瓠瓜生兩個各五瓠瓜明天

津九个彗弓形兩星入牛河中橫四个彗仲天津
上七个仲側扶箱星

女十一度下九尺為日月中道天之少府也謂
之須女者須賤妾之稱婦職之卑者也主婦女
之位其星如婦功之式主布帛裁製嫁娶星明
天下豐女功昌小暗則國藏虛移動則婦女受
殃產死者多后妃廢日月食國憂木犯立后火
犯女喪金犯災土孛犯損蠶月暈婦人災又曰
水守之萬物不成火守之布帛貴人多死土守
之有女喪金守之兵起十二國有十六星齊一
星在九坎之東齊北二星曰趙趙北一星曰鄭
鄭北一星曰越越東二星曰周周東南北列二

星曰秦秦南二星曰代代西一星曰晉晉北一
星曰韓韓北一星曰魏魏西一星曰楚楚南一
星曰燕燕星有變各以其國離珠五星在須女
北須女之藏府也為女子之星非其故後宮亂
客星犯之後宮凶瓠瓜五星在離珠北主陰謀
主後宮主果食明則歲熟微則后失勢瓜果不
登客星守之魚鹽貴旁五星曰敗瓜主種與瓠
瓜略同天津九星在虛危北橫漢中津梁所度
明而動則兵起如流沙死人如亂麻參差不齊
馬貴一星不備關梁不通三星不備覆陷天下
星亡水災河溢水賊稱王彗仲四星在天津北
古車正也金火守之兵車必起扶箱七黑星主

蠶事見吉不見凶

宋兩朝天文志女四星距西南星去極一百四
度半 十二諸侯十六星其趙距西星去極一
百二十三度入牛宿四度 離珠五星距東北
大星去極九十五度入牛宿六度半 敗瓜五
星距南星去極八十二度半入牛宿六度 瓠
瓜五星距西星去極七十九度入牛宿七度
天津九星距西宿星去極四十七度半入斗宿
二十三度 奚仲四星距西北星去極三十八
度入牛宿十八度

宋中興天文志石氏云女一名婺女左傳昭公
十年有星出於婺女杜預注婺女為既嫁之女

織女為處女也

夾漈鄭氏曰謹按天之所覆者廣而華夏所
占者牛女下十二國耳牛女在東南故釋氏
謂華夏為南贍部州其二十八宿所管者多
十二國之分野隨其所隸耳

按鄭氏因牛女間有十二國星而以為華
夏所占者只牛女二宿且引釋氏南贍部
州之說以為證然以十二次言之牛女雖
屬揚州而華夏之地所謂十二國者則不
特揚州而已又揚州雖可言東南而牛女
在天則北方宿也與南贍部州之說異矣
且北斗七星其次舍自張而至於角星書

以為一主秦二主楚三主梁四主吳五主
趙六主燕七主齊五車五星其次舍在畢
星書以為西北一星主秦東北一星主趙
燕東南一星主魯衛中央一星主楚西南
一星主魏然則北斗五車所主者亦此十
二國而此二星初未嘗屬乎牛女也謂牛
女專主華夏可乎

虛上下各一如連珠命祿危非虛上呈虛危之下
哭泣星哭泣雙雙下壘城天壘圓團十三星敗曰
四星城下橫曰西三箇離瑜明

虛九度少強冢宰之官也主邑居廟堂祭祀之
事又主風雲死喪下九尺為天之中道明靜則

天下安動搖則有死喪哭泣日月食兵起流星
犯賊亂宗廟五星犯有災虛北二星曰司命主
舉過行罰滅不祥又北二星曰司祿主爵祿增
年延德故在六宗之祀司危二星在司祿之北
主驕佚司非二星在危之北主愆過凡此四司
皆黑星明大為災居常則平虛南二星曰哭主
號哭也哭東二星曰泣主死明則國多哭泣金
火守之亦然泣南十三星曰天壘城如貫索形
主北夷丁零匈奴敗曰四星在虛危南知凶
災他星守之飢兵起秦代東三星南北列曰離
瑜離圭衣也瑜玉飾皆婦人之服也星微則後
宮儉約明大則婦人奢

宋兩朝天文志虛二星距南星去極一百度半
司命二星距西星去極九十二度入虛宿三度
司祿二星距西星去極九十度入虛宿四度
司危二星距西星去極八十五度半入女宿八
度 司非二星距西星去極七十九度半入女
宿九度半 哭二星距西星去極一百一十七
度半入女宿九度 泣二星距南星去極一百
四度半入危宿三度 天壘城十三星距西星
去極二百二十六度入女宿十一度 敗曰四
星距北星去極一百三十九度半入虛宿八度
離瑜三星距西星去極一百二十八度入女宿
九度

危三星不直舊先知危上五黑號人星入下三四
杵曰形人上七烏號車府府上天鈎九黃晶鈎上
五鷗字造父危下四星號墳墓墓下四星斜虛梁
十箇天錢梁下黃墓傍兩星能蓋屋身著黑衣危
下宿

危十六度主天府天市架屋甘氏云為天市廟
堂下九尺為天之中道主架屋受歲風雨墓墳
祠祀如動則天下大動土功張衡云虛危等為
死喪哭泣之事亦為邑居廟堂祠祀之事冢宰
之官動則死喪哭泣火守則天子將兵金守則
飢饉兵起虛危動則有土功火守則兵起水守
則下謀上一云危動則不明土功兵革起月暈

日月五星犯即有災車府東南五黑星曰入星
有如人象主靜衆庶柔遠能邇一曰卧星主防
淫不見則人有詐行詔書明則人安暗凶内杵
三星在人星傍主軍糧正直下曰吉不相當糧
絕不直民飢内曰四星在人星東南主春曰覆
則大飢仰則大豐隋志云客星入杵曰兵起天
下聚米天津東南七星曰車府東近河邊抵司
非主官車之府金火守之兵車大動天鉤九星
如鉤狀在造父西河中主乘輦服飾法式直則
地將動明則服飾正也傳舍南河中五星曰造
父御官也一曰司馬或曰伯樂星亡馬大貴明
則吉墳墓四星在危下如墓形主喪葬之事明

則多死亡虛梁四星在蓋屋南主園陵寢廟非
人所處故曰虛梁金火守入犯兵災大起天錢
十星在北落西北主錢帛所聚占明則府藏盈
不爾虛耗金火守之兵盜起蓋屋二星在危南
主天子所居室亦為官室之官金守之國兵起
彗星尤甚也

宋兩朝天文志危三星距南星去極九十六度
入五星距西南星去極七十度入虛宿六度半
杵三星距南星去極六十一度半入危宿三度
曰四星距西南星去極六十九度半入危宿三
度半車府七星距西第一星去極五十六度
半入虛宿四度半造父五星距北星去極三

十八度入危宿十一度 墳墓四星距中星去
極九十六度入危宿五度半 虛梁四星距東
西去極一百度半入危宿八度 天錢十星距
東北星去極一百一十八度入危宿三度 蓋
屋二星距西星去極九十七度入虛宿九度
室兩星上有離宮出遶室三雙有六星下頭六箇
雷電形壘壁陣次十二星十二兩頭大似升陣下
分布羽林軍四十五卒三為羣壁西四星多難論
子細歷歷看區分三粒黃金名鈇鉞一顆真珠此
落門門東八魁九箇子門西一宿天綱是電傍兩
黑土公吏騰蛇室上二十二
室十七度亦謂之營室甘氏為太廟天子之宮

也石氏謂之元宮一曰清廟又謂軍糧之府及
土功事星明國昌小不明祠祀鬼神不享國多
疾疫動則有土功兵出野離宮六星兩兩居之
分布室壁之間天子之別宮也主隱蔽休息之
所金火守入則兵起室南六星曰雷電主興雷
動蟄明或動則震雷作壁陣十二星在羽林北
橫列營室之南羽林之垣壘也星衆而明則安
寧希而動則兵革起不見天下亂五星入天軍
皆為兵起金火水尤甚羽林四十五星三三而
聚散在營室之南天軍也主軍騎又主翼王也
星衆而明則安寧希而動則兵革起不見天下
亂金火水守入兵起斧鉞三星亦曰斧鑕在八

魁西北主誅夷不明則斧鑕不用移動則兵起
有星入之皆為大臣誅北落師門一星在羽林
西南天之蕃落也亦曰天軍蕃之候門長安北
門曰北落門以象此也主非常以候兵明大則
軍安微弱則兵起金火守之有兵災一曰有星
守之虜入塞北落東南九黑星曰八魁主張禽
獸之官也客星入之多盜賊兵起金火入亦然
北落西南一星曰天綱主武帳天子游獵之所
會金火守兵起室西南二星曰土功吏主土功
之官也動搖則有修築之事隋志土功吏主司
過度騰蛇二十二星在營室北若盤蛇之狀居
於河濱謂之天蛇星主水蟲微則國安明則不

寧移南大旱移北大水客星守之水雨為灾水
物不收

宋兩朝天文志室二星距南星去極八十度半
雷電六星距西南星去極八十七度入危宿十
二度 辟陣壘十二星距西第一星去極一百
十五度入女宿十一度 羽林四十五星距大
星去極一百一十七度入危宿十五度半 斧
鉞三星距北星去極一百三十度入室宿二度
北落師門一星去極一百二十六度 危宿十
一度半 八魁九星距南星去極一百三十九
度入辟宿四度半 天綱一星去極一百二十
九度入危宿五度 土公二星距西星去極八

十五度入辟宿初度 騰蛇二十二星距中大星去極四十四度少入危宿九度半

宋中興天文志曰甘氏云雷電在室南霹靂在雷電南雲雨在霹靂南土工吏在辟西南蓋雷公電姥雲將雨師與夫霹靂斧吏皆北方水府之精而嫫訾為天門故其神棲焉室不得司之也

辟兩星下頭是霹靂霹靂五星橫著行雲雨次之曰四方辟上天廡十圓黃鈇鎖五星羽林傍

辟九度下九尺為天之中道主文章天下圖書之祕府也亦主土功明則圖書集道術行小人退君子進星失色大小不同天子重武臣賤文

士圖書隱親黨回邪用星動則有土功離徙就聚為田宅事日月食損賢臣五星孛犯兵起土功西南五星曰霹靂主興雷奮擊明而動用事不明凶霹靂南四星曰雲雨明則多雨水火守之大旱天廡十星在東辟北蓋天馬之廡今之驛亭也不見則天下道斷鈇鎖五星在天倉西南刈具也主斬芻飼牛馬明則牛馬肥微暗則牛馬飢餓并死喪也

宋兩朝天文志辟二星距南星去極八十度半霹靂五星距西星去極九十三度入危宿十五度雲雨四星距西北星去極九十五度入室宿五度天廡十星距西星去極四十九度半

入辟宿初度

西方 白虎七宿

宋中興天文志石氏云西宮白帝其精白虎為七宿奎象白虎婁胃昂虎三子也畢象虎觜參象麟觜首參身也司秋司金司西嶽司西海司西方司毛蟲三百有六十五奕曰蒼龍朱雀靈龜不獨蟲之長也實為王者嘉瑞故列宿象焉白虎冥預也曰白虎亦瑞獸也爾雅謂之魼胡甘反蓋騶虞之異名也不食生物食自死肉其性至仁五靈之一也以五行媿之蒼龍木也木得其性則蒼龍見朱鳥火也火得其性則朱鳥見靈龜水也水得其性則靈龜見白虎金也金

得其性則白虎見與麟鳳龜俱為王者之瑞故西方七宿配焉漢宣帝時南郡獲白虎宋元嘉中琅琊有白虎史臣俱以為瑞而特書之也奎腰細頭尖似破鞋一十六星遶鞋生外屏七鳥奎下橫屏下七星天溷明司空左畔土之精奎上一宿軍南門河中六箇閣道形附路一星道傍明五箇吐花王良星良星近上一策名奎十六度天之武庫也石氏謂之天豕亦曰封豕主兵九尺下為天之中道又主溝瀆西南大星所謂天豕目亦曰大將明則天下安動則兵亂客星守入兵起金火守有水灾隋志云若帝淫泆政不平則奎有角角動則有兵不出年中

或有溝瀆之事又曰奎中星明水大出日月食
五星犯皆有凶奎南七星曰外屏以蔽天溷也
占與天困同天溷七星在外屏南天之廁也不
見則人不安移徙亦然天溷南一星曰土司空
主水土之事大而黃明天下安若客星入之多
土功天下太疫軍南門一星在將軍西南主誰
何出入動搖則軍行不見則兵亂閣道六星在
王良前飛道也從紫宮至河神所乘也一曰主
道里張衡云天子游別宮之道一曰王良旗一
曰紫宮旗亦所以為旗表而不欲其搖動一星
不具則輦道不通動搖則宮掖之內兵起附路
一星在閣道南傍別道也備閣道之敗傷而乘

之也一曰太僕主禦風雨亦游從之義也一曰
占與閣道同王良五星在奎北居河中天子奉
車御官也其四星曰天駟旁一星曰王良亦曰
天馬其星動為策馬故曰王良策馬車騎蒲野
亦曰王梁梁為天橋主禦風雨水道故或占津
梁其星移主有兵亦曰馬病客星守之橋不通
金火守之皆為兵憂前一星曰策王良之御策
也主天子僕御在王良旁若移在馬後是謂車
騎蒲野
宋兩朝天文志奎十六星距西南大星去極七
十二度外屏距西星去極八十九度八驛宿
八度半天溷七星距西南星去極九十七度

入奎宿三度 土司空一星去極一百一十五
度少入辟宿九度 軍南門一星去極六十六
度入奎宿十五度 附路一星去極三十五度
半入奎宿五度 王良五星距西星去極三十
七度入辟宿初度
婁三星不勾近一頭左更右更鳥夾婁天倉六箇
婁下頭天庾三星倉東脚婁上十一將軍侯
婁十二度下九尺為日月中道亦為天獄主苑
牧犧牲供給郊祀亦為興兵聚眾動搖則聚眾
星直則有執主之命者就聚國不安金火守之
則宮苑之內兵起日月食宮內亂金木火土犯
凶水犯吉亭起兵月暈兩軍各退左更五星在

婁東山虞也主知山澤林藪之事亦主仁智右
更五星在婁西牧師也主官養牧牛馬亦主禮
義金火守之山澤有兵其占兩更同兩更者秦
爵名天倉六星在婁南倉穀所藏也星黃而大
歲熟西南四星曰天庾積厨粟之所也天將軍
十一星在婁北主武兵中央大星天之大將也
外小星吏士也大將星搖兵起大將出小星不
具兵起

宋兩朝天文志婁三星去距中星極七十五度
半 左更五星距西南星去極七十六度半入
婁宿四度半 右更五星距東北星去極七十
五度入奎宿十四度 天倉六星距西北星去

極一百四度半入奎宿十一度 天庾三星距
中大星去極一百二十五度半入婁宿五度
天大將軍十一星距大星去極六十度半入婁
宿四度

胃三星鼎足河之次天廩胃下斜四星天困十三
如乙形河中八星名太陵陵北九箇天船名陵中
積尸一箇星積水船中一黑星

胃十五度天之厨藏五穀之倉也又名大梁明
則四時和平天下晏然倉廩實不明則上下失
位星少則少穀輸運又云動則有輸運事就聚
則穀貴人流暗則凶荒五星犯日月食孛侵並
有災天廩四星在昴南一曰天層張衡云主積

蓄黍稷以供享祀春秋所謂御廩也天困十三
星在胃南倉廩之屬主給御糧也明而黃則歲
豐微變常色則不吉金火守之即災起太陵八
星在胃北主陵墓明而大或中星多則天下多
死喪或兵起天船九星在太陵之北居河中一
白舟星主渡亦主水旱不在河中津河不通水
泛溢中四星欲其均明即天下安不則兵若喪
移徙亦然客星出入為大水有兵太陵中一星
曰積尸明則死人如山張衡云一名積廩積尸
明而大或有傍星多則天下多死喪或兵起若
不見而暗皆吉火守則天下大哭泣天船中一
星曰積水主候水災

宋兩朝天文志胃三星距西南星去極六十七度半 天廩四星距南星去極八十五度半入胃宿十二度 天困十三星距大星去極九十二度半入胃宿六度半 大陵八星距大星去極五十四度入胃宿七度 天船九星距大星去極五十四度半入胃宿十度 積尸一星去極五十五度入胃宿四度 積水一星去極五十三度入昴宿初度

昴七星一聚實不少河西月東各一星月下五黃天陰名陰下六烏芻藁營營南十六天苑形河裏六星名卷舌舌中黑點天讒星礪石舌傍斜四丁昴十一度下為日月中道天之耳目也主西方

主獄事又為旄頭胡星也又主喪甘氏云主口舌奏對若明大則君無佞臣天下安和暗小則佞者被誅搖動則信讒殺忠良張衡云昴明則獄訟平暗則刑罰濫六星與大星等大水有白衣會七星黃兵大起動搖有大臣下獄大而盡動若跳躍者胡兵大起一星不見皆憂兵之象也天河一星在胃東月一星在昴東皆黑星並主女人災福又曰天河主察山林妖變天陰五星在畢柄西主從天子弋獵之臣預陰謀也不明則禁言漏洩天苑十六星在昴畢南如環狀天子之苑囿養禽獸之所也主馬牛羊明則馬牛羊盈希則死芻藁六星在苑西以供牛馬之

食也一曰天積天子之歲府也星盛則歲豐穰
希則貨財散張衡云不見則牛暴死火守之則
火災起卷舌六星在昴北天讒之外主口語以
知讒佞張衡云主樞機曲而靜則賢人用直而
動則讒人得志卷舌移出漢則天下多妄言旁
星繁則死人如丘山天讒一星在卷舌中主醫
巫占與從官同礪石四星在五車北主磨礪鋒
刃明則兵起如常則吉金火及客星守之兵動
宋兩朝天文志昴七星距西南星去極七十度
天河一星去極六十六度入胃宿十度 月一
星去極七十一度半入昴宿五度 天陰五星
距西星去極七十五度半入胃宿七度 天苑

十六星距東北星去極一百七度半入昴宿七
度半 芻藁六星距西行中星去極一百八度
入婁宿十一度 卷舌六星去極五十三度入
昴宿初度 天讒一星去極六十一度半入昴
宿半度 礪石四星距南第二星去極六十五
度入昴宿六度

宋中興天文志月與天街皆在昴畢間故昴畢
之間為天街黃道之所經也月者陰宗之精也
為兔四足為蟾蜍三足兔在月中而蟾蜍之精
為星以司太陰之行度月生於西故於是在焉
日精在氐房月精在昴畢自司其行度而氐房
昴畢乃黃道之所經不得而司之

畢恰似爪义八星出附耳畢股一星光天街兩星
畢背傍天節耳下八烏幢畢上橫列六諸王王下
四皂天高星節下團圓九州城畢口斜對五車口
車有三柱任縱橫車中五箇天潢精潢畔咸池三
黑星天闕一星車脚邊參旗九箇參車間旗下直
建九旂連旂下十三烏天園九旂天園參脚邊
畢十七度主邊兵主弋獵其大星曰天高一曰
邊將主四夷之尉也星明大則遠夷來貢天下
安失色則邊兵亂一星亡為兵喪動搖邊城兵
起有讒臣離徙天下獄亂就聚法令酷甘氏云
畢主街巷陰雨天之雨師也故明而移動則霖
潦及街壅塞明而定則天下安張衡云畢為天

馬一曰日月食邊兵凶將衰木犯有軍功昴畢
間二星曰天街三光之道也主伺候關梁張衡
云主國界也街南為華夏街北為夷狄金火守
之胡夷兵起明王道正暗兵起附耳一星在畢
下天高東南隅主聽得失伺愆邪察不祥星盛
則中國微有盜賊邊候警外國反鬪兵連年合
移動則佞讒行兵大起邊尤甚入畢兵起天節
八星在畢南主使臣之所持也宣威德於四方
明吉闇凶諸王六星在五車南天漢之中主宗
社蕃屏王室也明則諸侯奉上天下安不見宗
社傾危四方兵起天高四星在參旗西北近畢
比臺榭之高主遠望氣象不見則官失其守陰

陽不和五車五星三柱九星共十四星在畢東
北五車主天子五兵張衡云天子兵車舍也西
北曰天庫主太白秦也次東北星曰天獄主辰
星燕趙也次東南星曰天倉主歲星衛魯也中
央星曰司空主鎮星楚也次西南星曰卿主熒
惑魏也五星有變各以其所主而占之三柱一
曰三泉一曰休一曰旗五星均明柱皆具即入
倉廩實不具其國絕食兵且起五車三柱有變
各以其國占之三柱出外兵出柱入兵入柱出
一月米貴三倍期一年出兩月米貴六倍期二
年出三月米貴十倍期三年柱出不與天倉相
近米穀運出千里柱倒立尤甚火入守天下旱

金入守兵起水入月暈不爾則有赦天潢五星
在五車中主河梁濟渡之處也不見則河梁不
通咸池三星在五車中天潢南魚圍也金火犯
之則有大災隋志云月五星入天潢兵起道不
通天下亂易政咸池明有龍墜死虎狼害人兵
起天關一星在五車南畢西北亦曰天門日月
五星所行之道也主邊塞事主關閉芒角有兵
五星守之貴人多死移徙若與五車合大將軍
披甲參旗九星在參西五車之間天旗也明而
希則邊寇不動不然反是隋志參旗一曰天旗
一曰天弓主司弓弩之張候變禦難玉井西南
九星曰九旂天子之旗也主邊軍進退金火守

之兵亂起天苑之南十三星曰天園植果菜之所也曲而鉤則果菜熟不然則否

宋兩朝天文志畢八星距右股第一星去極七十五度 天街二星距南星去極七十一度入昂宿十度 附耳一星去極七十七度入畢宿三度 天節八星距北星去極八十度半入畢宿三度 諸王六星距西星去極七十度入畢宿三度 天高四星距東星去極七十四度半入畢宿六度 五車五星三柱九星距大星去極四十七度半入畢宿八度半 天潢五星距西北星去極五十八度入畢宿十一度 咸池三星距南星去極五十一度入畢宿十一度半

天關一星去極七十一度半入觜宿初度 參旗九星距南第二大星去極八十七度入畢宿六度九旂九星距南星去極一百一十三度入畢宿十二度 天園十三星距東北星去極一百二十四度入畢宿五度

觜三星相近作參彙觜上坐旗直指天尊卑之位九相連司恠曲立坐旗邊四鴟大近并鉞前

觜一度在參之右角如鼎足形主天之關明大則天下安五穀熟移動則君臣失位天下旱隋志云觜觶為三軍之候行軍之蔽府主葆旅收斂萬物明則軍儲盈將得勢動而明盜賊羣行葆旅起動移將有逐者張衡云葆旅野生之可

食者金火來守國易政兵起災生日食臣不忠
月食君害臣五星犯災生孛客星犯兵起坐旗
九星在司恠西北主別君臣尊卑之位明則國
有禮暗則反是司恠四星在井鉞前候天地日
月星辰禽獸蟲蛇草木之變與天高占同
宋兩朝天文志觜三星距西南星去極八十二
度半 坐旗九星距南星去極六十一度半八
參宿八度司恠四星距西星去極七十一度八
參宿六度半

參摠有七星觜相侵兩肩覆足三為心伐有三星
足裏深玉井四星右足陰屏星兩扇井南襟軍井
四星屏上吟左足下四天廁臨廁下一物天屎沉

參十度上為五星日月中道甘氏曰參為忠良
孝謹之子明大則臣忠子孝安吉移動殺忠臣
一曰參伐一曰大辰一曰天布一曰鈇鉞主斬
刈又為天獄主殺伐又主權衡所以平理也又
主邊城為九譯故不欲其動也參白獸之體其
中三星橫列三將也東北曰左肩主左將西北
曰右肩主右將東南曰左足主後將軍西南曰
右足主偏將軍故黃帝占參應七將中央三小
星曰伐天之都尉也主朝鮮卑戎狄之國故不
欲明又曰七將皆明天下兵精也王道缺則芒
角張伐星明與參等大臣謀亂兵起參星失色
軍散敗芒角動搖邊候有急天下兵起又曰有

斬伐之事參左足入玉井中兵大起秦地大水
若有喪山石為恠參足若突出玉井則虎狼暴
害入差戾王臣貳釜火來守則國易政兵起災
生日月食則田荒米貴五星犯灾甚玉井四星
在參西右下水象也屏二星在玉井南屏為屏
風客星入之四足蟲大疾人亦多死不見則國
內寢疾玉井東下四星曰軍井行軍之井也軍
井未達將不言渴名取此也又曰主軍營之事
天厠四星在屏東濶也主天下疾病黃吉青赤
白皆凶不見與屏同天屎一星在厠南色黃則
吉他色皆凶兩朝天文志參十星距中星西第
一星去極九十二度半 玉井四星距西北星

去極九十八度少入畢宿十一度半 天屏二
星距南星去極一百一十五度入畢宿十三度
半 軍井四星距西南星去極一百五度半入
畢宿十四度 天厠四星距西北星去極一百
一十度半入參宿二度 屎一星去極一百一
十五度入參宿三度半

南方 朱鳥七宿

中興天文志石氏云南宮赤帝其精朱鳥為七
宿井首鬼目柳喙星頸張紫翼翻軫尾司夏司
火司南嶽司南海司南方司羽蟲三百有六十
王奕曰朱鳥其以羽蟲之長稱歟而曰鶉首鶉
火鶉尾何也師曠禽經鶉鳳也青鳳謂之鶉赤

鳳謂之鶉白鳳謂之鶉紫鳳謂之鶉蓋鳳生於丹穴鶉又鳳之赤者故南方七宿取象焉攷之月令春其蟲鱗龍鱗之長故東方之宿為蒼龍秋其蟲毛虎毛蟲之長故西方之宿為白虎冬其蟲介龜介蟲之長故北方之宿為玄武夏其蟲羽鳳羽蟲之長故南方之宿為朱鳥吳興沈氏以朱鳥為丹鶉豈知四獸皆蟲之長也鶉之微何預

井八星橫列河中淨一星名鉞井邊安兩河各三南北正天樽三星井上頭樽上橫列五諸侯侯上北河西積水欲覓積薪東畔是鉞下四星名水府水位東邊四星序四瀆橫列南河裏南河下頭是

軍市軍市團圓十三星中有一箇野雞精孫子文入市下列各立兩星從東說闕丘二箇南河東丘下一狼光蒙茸左畔九箇彎弧弓一矢擬射頑狼曾有箇老人南極中春秋出來壽無窮

井三十四度甘氏云井八星在河中主泉水日月五星貫之為中道石氏謂之東井亦曰天井主諸侯帝戚三公之位故明大則封侯建國搖動失色則誅侯戚廢戮三公帝師受殃矣張衡云天之南門也黃道所經為天子之亭候主水衡事法令所取平也王者用法平則井明而端列鉞一星附井之前主伺奢淫而斬之故不欲其明大與井齊或搖動則天子用鉞於大臣月

宿井有風雨之應又曰井為天子府暗芒并日月食五星逆犯大臣謀亂兵起中有六星不欲大明明即水災南北兩河各三星分夾東井一曰天高天之闕門主關梁南河曰南戍一曰南宮一曰陽門一曰越門一曰權星主火北河曰北戍一曰北宮一曰陰門一曰胡門一曰衡星主水兩戍之間三光之常道也河戍動搖中國兵起天樽三星在五諸侯南主盛饘粥以給酒食之正也張衡云以給貧餒明則豐暗則荒或言暗吉五諸侯五星在東井東北近北河主刺舉戒不虞又曰治陰陽察得失亦曰主帝心一曰帝師二曰帝友三曰三公四曰博士五曰太

史又曰五曰大夫此五者常為帝定疑議星明大潤澤則天下大治芒角則禍在中張衡又曰五諸侯治陰陽察得失明而潤大小齊等則國之福又曰赤則豐暗則荒積水一星在河北所以供酒用也不見為災又曰主候水災積薪一星在積水東以備庖厨之用明則入主康火守之大旱水府四星在東井西南水官也占與水位同水位四星在東井主水衡又主瀉溢流也故巫咸氏贊曰水位四星瀉溢流移動近北河則國沒為江河若水火及客星守犯之百川盈溢四瀆四星在井南軒轅東以江河淮濟之積精也明大則水泛溢軍市十三星如錢狀在參

東南天軍貨易之市客星及金火守之軍大飢
野雞一星在軍市中主變怪也以芒角動搖為
兵灾移出則諸侯兵起軍市西南二星曰丈人
丈人東二星曰子子東二星曰孫丈人主壽考
之臣不見人臣不得通子與孫皆侍丈人之側
相扶而居不見為灾守常無咎闕丘二星在南
河東主象魏天子之霍闕諸侯之兩觀也金火
守之兵戰闕下狼一星在井東南為野將主殺
掠色有常不欲變動角而變色動搖盜賊作胡
兵起人相食躁則人主不靜不居其宮馳騁天
下張衡云居非其處則人相食色黃白而明吉
黑凶赤芒角兵起金火守之亦然弧矢九星在

狼東南天弓也以備盜賊常向狼弧矢動搖不
如常者多盜賊明則兵大起狼弧張害及胡天
下垂亂又曰天弓張天下盡兵主與臣相謀張
衡云引滿則天下兵起老人一星在弧南一曰
南極常以秋分之旦見于丙春分之夕沒于丁
常以秋分候之南郊明大則人主有壽天下安
寧不見則人主憂

兩朝天文志井八星距西扇北第一星去極六
十九度鉞一星去極六十九度少入參宿八度
半北河三星距東大星去極六十一度半入
井宿二十度南河三星距東大星去極八十
三度半入井宿二十一度天樽三星距西星

去極六十八度入井宿十六度 五諸侯五星
距西星去極五十六度半入井宿六度半 積
水一星去極五十四度半入井宿十八度 積
薪一星去極六十五度半入井宿二十七度
水府四星距西星去極七十六度半入參宿七
度半 水位四星距西星去極七十三度半入
井宿十八度 四瀆四星距西南星去極八十
六度入井宿二度 軍市十三星距西北星去
極一百七度半入井宿初度 野雞一星去極
一百九度半入井宿四度半 丈人二星距西
星去極一百二十八度入參宿四度 子二星
距西星去極一百二十八度入參宿九度 孫

二星距西星去極一百二十五度入井宿六度
闕丘二星距大星去極九十一度少入井宿十
五度 狼一星去極一百七度半入井宿十度
弧矢九星去極一百一十四度入井宿十五度
老人一星去極一百四十三度入井宿三度
宋中興天文志南極老人在弧矢南司天下人
民壽筭蓋北極在丑艮故南極在未坤南極入
地三十六度不可得而見也故其精神出地以
見乎南謂之南極老人然其出地亦不甚遠故
隱是不常見則為祥其勢位等威蓋與中斗相
埒以輔上帝故雖在井分井不得而司之也
鬼四星冊方似木櫃中央白者積尸氣鬼上四星

是燿位天狗七星鬼下是外厨六間柳星次天社
六箇弧東倚社東一星是天紀

輿鬼二度為日月五星之中道主死亡疾病張
衡云主祠事天目也又主視明察奸謀東北星
主積馬東南星主積兵西南星主積布帛西北
星主積金玉隨其變占之中央一星名積尸亦
曰積尸氣者但見氣而已主死喪祠祀一曰鈇
質主誅斬鬼星明大穀成不明人散動而光上
賦歛重徭役多星徙人愁政令急鬼質欲其忽
忽不明則安明則兵起大臣謀主下流亡甘氏
云積尸搖動失色則疾病鬼哭人荒軒轅西四
星曰燿亦曰烽燿主烽火備警急占以不明安

靜明大甚則邊亭警急搖動芒角亦然又曰明
吉暗凶天狗七星在鬼西南狼之北橫河中
守賊也移徙則兵起金火守之人相食外厨六
星在柳南天子之外厨也占與天厨同弧南六
星為天社在老人東南似柳直明則吉隋志云
共工之子勾龍能平水土故祀以配社其精為
星外厨之南一星曰天紀主知禽獸齒歲金火
守之禽獸多死

兩朝天文志鬼四星距西南星去極六十九度
半 燿四星距西北星去極六十度半入井宿
二十九度 天狗七星距西星去極一百二度
入井宿二十二度 外厨六星距大星去極九

十二度半入鬼宿二度 天社六星距西南星
去極一百二十四度入井宿十二度 天紀一
星去極一百一度半入柳宿五度
柳八星曲頭垂似柳近上三星號為酒享宴大酺
五星守

柳十四度上為天之中道甘氏云主飲食倉庫
酒醋之位明大則入豐酒食搖動則大人酒死
失色則天下不安飢饉流於道路不過三年必
應張衡云柳為朱雀之喙天之厨宰也主尚食
和滋味隋志云又主雷雨一曰天相一曰天庫
一曰注又主木功星明大臣重慎國安厨食具
注舉首王命興輔佐出星直天下謀伐其王就

聚兵鬪國門酒旗三星在軒轅右角之南酒官
之旗也主享宴飲食五星守酒旗天下大酺有
酒肉財物之賜及爵宗室

兩朝天文志柳八星距西第三星去極八十二
度半 酒旗三星距西北星去極七十七度入
柳宿十四度

星七星如鉤柳下生星上十七軒轅形軒轅東頭
四內平平下三箇名天相相下稷星橫五靈

七星七度甘氏云主后妃御女之位亦為賢士
失色芒動則后妃死賢士誅明大則道化成國
盛張衡云七星為朱鳥之頸一名天都主衣裳
文繡隋志云主急兵守盜賊故欲明則王道昌

暗則賢良不處天下空天子疾動則兵起離則
易政日食兵飢婦人灾木犯人安火犯旱金土
水犯俱灾月暈字犯兵起軒轅十七星在七星
北黃帝之神黃龍之體也后妃之主士女職也
一曰東陵一曰權星主雷雨之神南大星女主
也次北一星夫人也屏也上將也次北一星妃
也次將也其次諸星皆次妃之屬也女主南小
星女御也左一星少民少后宗也右一星大民
太后宗也欲其色黃小而明也張衡云軒轅如
龍之体主雷雨之神後宮之象焉陰陽交合盛
為雷激為電和為雨怒為風亂為霧凝為霜散
為露聚為雲立為虹蜺離為背商分為抱珥此

十四變皆軒轅主之其星欲小而黃明則吉移
徙則國人流逆東西角張而振后敗水火金守
之主惡也漢注曰軒轅為權太微為衡月五
星守犯者如衡占內平四星在中台南燿之北
平罪之官也明則刑罰平暗則否酒旗南三星
曰天相丞相之象也其占與相星略同稷五星
在七星之南主農正也取乎百穀之長以為其
號明大則歲大豐不明則儉不見則入相食
兩朝天文志星七星距大星去極九十六度
軒轅十七星距大星去極七十五度八張宿二
度內平四星距西星去極五十二度八張宿
六度天相三星距北星去極九十五度八星

宿六度 天稷五星距大星去極一百三十七度入柳宿十三度

中興天文志石氏云中宮黃帝其精黃龍為軒轅首枕星張尾掛柳井體映三台司四季司中嶽司中土司黃河江漢淮濟之水司黃帝之子孫司倮蟲三百六十按張衡靈憲蒼龍連蜷於左白虎猛擗於右朱雀奮翼於前靈龜圈脊於後黃龍軒轅於中則是軒轅一星與蒼龍白虎朱雀玄武四獸為五矣世之言星者惟知四獸而不知黃龍是求之未盡也孟康曰軒轅為權太微為衡以軒轅一曰權星故為權太微垣主理法平詞如衡之平故曰衡史記正義謂權四

星在軒轅尾西非也軒轅西四曰燿星主烽火備警急不曰權也燿字從火誤為權字張守節不審指以釋此殊為踈繆

又曰或謂自有乾象便有此星軒轅果黃帝之神也有黃帝而後有之乎呂氏曰軒轅之星黃龍也兩角有軒轅之象故名之曰軒轅軒轅降神而生黃帝知之故自號曰軒轅云爾號軒轅非名也且如王良奚仲造父皆星名亦其神降而為人人去而復為星也何獨於軒轅疑之

按軒轅本天市垣之星而在張宿之分野則南方朱鳥七宿之所司也三垣中外官諸星雖所掌有小大其位有尊卑而未有

不隸於二十八宿者蓋二十八宿分布周天之躔度分野不可外也中興天文志據石氏星書以黃龍軒轅配四方二十八宿所謂青龍朱鳥玄武白虎者分而為五而以為土德寄王鶉火夫五行之不可缺土土之寄王固然矣遂以為燿積木積薪五諸侯天樽闕丘北河南河四瀆水位諸星皆為軒轅之屬按燿以下諸星與軒轅亦俱寄躔於二十八宿者也今欲尊軒轅而以諸星屬之則軒轅豈能外二十八宿而自為躔度分野以處諸星乎

張六星似軫在星傍張下只是有天廟十四之星

冊四方長垣少微雖向上星數歌在太微傍天尊一星直上黃

張十七度甘氏云主天廟明堂御史之位上為天之中道若明大則國盛強失色宗廟不安明堂宮廢隋志云主珍寶宗廟所用及衣服又主天厨飲食賞賚之事星明則王者行五禮得天之中動則賞賚離徙天下有逆人就聚有兵金火守之有兵起或云主貢物色細無光王者少子孫日食虧修禮也月食大滂魚行人道火字犯兵起土水犯國不寧張南十四星曰天廟天子祖廟也客星守之祠官有憂其占與虛梁同長垣四星在少微南主界域及胡夷火守之胡

人入中國太白入之九卿謀反少微四星在太
微西南北列士大夫之位也一名處士亦天子
副主或曰博士官一曰主衛掖門南第一星為
處士第二星為議士第三星為博士第四星為
大夫明大而黃則賢士舉月五星犯守之處士
女主憂宰相易

兩朝天文志張六星距西第二星去極一百二
度半 天廟十四星距西北星去極一百十三
度半入柳宿十三度 長垣四星距南星去極
七十六度入張宿十四度 少微四星距東南
大星去極六十五度半入張宿十五度半
翼二十二星大難識上五下五橫著行中心六箇

恰似張更有六星在何處三三相連張畔附必若
不能分處所更請向前看野取五箇黑星翼下頭
欲知名字是東甌

翼十九度甘氏云主太微三公化道文籍失色
則民流日月交食五星並逆芒動則化道不行
文籍壞滅動移則三公廢明大則化成隋志云
翼為天之樂府主俳倡戲樂又主夷狄遠客負
海之賓明大則禮樂興四夷來賓動則蠻夷使
來離徙則天子舉兵或云明則禮樂興暗則政
教失日食臣僭月食婦人憂五星孛流客犯大
山東甌五星在翼之南蠻夷星也張衡云主東
越穿胸南越三夷金火守之其地有兵芒角動

移兵內叛

兩朝天文志翼二十二星距中央西第二星去極百四度 東甌五星距西南星去極一百二十九度入張宿七度

軫四星似張翼相近中央一箇長沙子左轄右轄附兩星軍門兩黃近翼是門下四箇土司空門東七烏青丘子青丘之下名器府器府之星三十二以上便為太微官黃道向二看取是

軫十七度甘氏云軫七星主將軍樂府歌謔之事五星犯之失位亡國女子主政人失業賊黨掠人禍生於百日内若明大則天下昌萬民康四海歸王張衡云軫為冢宰輔臣也主車騎明

天則車騎用一云明大則車騎動隋志云主載任有軍出入皆占於軫又主死喪明則車駕備動則車騎用離徙天子憂就聚兵大起軫轄星附軫兩傍主王侯右轄為王者同姓左轄為異姓星明兵大起遠軫凶軫轄舉南蠻侵張衡云轄不見國有大憂長沙一星在軫之中主壽命也長沙明則人壽長子孫盛軍門二黃星在青丘西天子六軍之門也主營候豹尾威旗占以移其處為道不通土司空四黃星在軍門南主土功巫咸氏云金火犯之天下田不得耕女不得織隋志云一曰司徒主界域青丘七黑星在軫東南主東方三韓之國占與東甌同軫南三

十二星曰器府主樂器之屬也明則樂器調理
暗則有咎

兩朝天文志軫四星距西北星去極一百三度
半 右轄星去極一百一十度半入翼宿十六
度半 左轄去極一百一度半入軫宿五度
軍門二星距西南星去極一百一十二度半入
翼宿十三度 土司空四星距南星去極一百
二十度入翼宿十四度 青丘七星距西北星
去極一百二十四度半入軫宿五度 器府三
十二星距西北星去極一百三十七度半入翼
宿八度半

中興天文志總論曰甘石巫咸三家後代所宗

也顧或不深考以故三垣大角之列衛二十八
舍內官外官之分隸不無異同今於三家參諸
說考定二百九十座所以不知者闕如也蓋諸
星有以一星為一座者有以二三十星為一座
者有相為比附者有相比而不附者杠附華蓋
凡十八星為一座衡附庫樓凡二十九星為一
座也鉞不附井耳不附畢糠不附箕長沙不附
軫鈞鈐鍵閉不附房則以屬吏自為官故也矢
得以附弧曰不得以附杵以弧矢一人司之杵
曰二人司之故也野雞不附軍市雞自守其所
司也南門不附庫樓南門不但為庫樓門也他
如積水不附天船積屍不附大陵天讒不附卷

舌咸池天潢三淵不附五車石氏甘氏皆有其
辨不可臆說也若夫稱名取類傳記錯見則又
有不可槩舉者北極為北辰水星為辰參為大
辰而大火亦曰大辰宋大辰之墟是也見左氏
昭十七年孫炎曰龍星明者以為時刻故曰大
辰心在中最明時刻主焉玄枵亦曰天龜星在
天龜是也見國語武王伐商星在天龜昭十九
年疏天龜玄枵別名也娠訾亦曰豕韋歲在豕
韋是也見襄十八年疏豕韋亦名娠訾也鶉尾
亦曰鳥帑以害鳥帑是也見襄二十八年裨竈
曰歲乘其次而旅於明年之次以害鳥帑注南
為朱鳥鳥尾曰帑疏曰人妻子為帑鳥尾曰帑

妻子為人後鳥尾亦鳥之後故俱以帑為言也
氏謂之天根見爾雅天根氏也郭璞曰角亢下
繫於氏猶木之有根國語曰天根見而水涸也
室謂之定見爾雅云營室謂之定郭璞曰定正
也作宮室以營室中為正詩定之方中作于楚
宮昂謂之留見史記索隱曰留昂也而毛傳亦
以留為昂也畢謂之濁見爾雅濁謂之畢也柳
謂之味丁救反見襄九年味為鶉火疏曰柳謂
之味味鳥口也若斯名類昉於堯典詳於爾雅
左氏國語諸書而所入之度則未悉也若夫二
十八舍諸言度分亦或差殊斗井度視諸舍為
闊參僅一度古昏旦至觀弧建為定亦由所見

而莫著其度近世王奕所述十二次二十八度有可考焉

按史志言三家所考三垣大角之列衛二十八舍内外官之分隸不無異同今按歷代天文志惟宋兩朝及中興志與隋丹元子步天歌能言諸星之分隸然大角一星兩朝志以為屬元中興志以為屬角庫樓十星丹元子以為屬角而兩朝志以為屬軫其為異同大槩若此蓋自唐開元中行所造渾儀其所測宿度已與舊經異而宋太平興國中渾儀所測又與唐異所爭或一二度或三五度以管窺天豈能無誤

於是此以為軫彼以為角甲以為氐乙以為房所差者常在裨鄰之次舍則亦不過三五度間耳天道幽遠術家各持一說固未有以訂其是非也至如南斗六星即斗牛之斗則其分野反在北方北斗天樞在張宿十度則其分野反在南方則其理有不可究詰者當俟知星者而質之

二十八宿度

中興天文志王奕按自古言天者皆曰周天三百六十五度四分度之一何從而知審也曰天本無度因日之行一晝夜所躔闊狹強名曰度蓋日之行也三百六十五日之外又行四分日之一以

年而周於天焉以一日所行為一度故分為三百六十五度四分度之一范蔚宗謂日之所行在天成度在曆成日是也曰天固有其度而二十八宿亦各有度何從而定之一也曰二十八宿亦未始有度也天體冲漠雖分為三百六十五度然其度難別也故作曆者隸其度於二十八宿用以紀日月所躔而已蓋天之有度也猶地之有里也二十八宿所分之度猶九州列縣所占之里也二十八宿各有其度則日之行於天也孟春在某星幾度仲春在某星幾度日躔可得而名也九州列縣各有其里則人之行於地也某日至某州幾里某日至某縣幾里驛可得而計也此星度所由起也曰

二十八宿之度或闊狹何也曰日之所躔偶與此宿相當此闊狹於是分也故說渾天者曰日之所躔或多或少適當其星者凡二十八故度之多寡於是生焉井斗之舍非無星也然不與日躔相當故其度不得不闊觜鬼之傍非無星也然日躔一二日而其星適與相當故其度不得不狹也夫其得度闊狹非舉一宿全體盡占此度也南斗六星也舉全體言之合距杓星為度而今曆家距魁第四星為度杓二星則入於箕牽牛六星也舉全體言之合距西二星為度今曆家距中二星為度而西二星則入於斗虛二星也舉全體言之合距北星為度而今曆家距南星為度北星則入於牽牛

蓋南斗六星之中杓二星不當日之度而魁第四星當度故距於魁而得二十六度牽牛六星之中西星不當日之度而中二星當度故牽牛距魁而得六度虛二星之中北一星不當日之度而南一星當度故虛距南星而得十度古之造曆假設是法以步日躔或者不察謂二十八宿本有其度又見某宿得幾度遂謂舉一宿全體在焉則又非矣又按唐志一行所謂北星舊圖入虛今側在須女九度危北星舊圖入危今側在虛六度半又奎誤距以西大星故辟損二度奎增二度今復距西南大星即奎辟各得本度又柳誤距以第四星今復用第三星張中央四星為朱鳥喙外二星為翼北

距以翼而不距以膺故張增二度半七星減二度半今復以膺為距則七星張合得半度吳興沈氏曰二十八宿為二十八星當度故立以為宿前世測候每或改變如唐書測得畢有十七度半觜只有半度之類皆繆說也星既不當度自不當為宿次自是渾儀度距疎密不等耳凡二十八宿度數皆以赤道為法推黃道有不合度者蓋黃道有斜有直故度數與赤道不等即復以當度星為宿惟虛度未有奇數自是日之餘分曆家取於斗分者此也餘宿則不然

沈氏筆談曰予編校昭文書時預詳定渾天儀官長問予二十八宿多者三十三度少者

止一度如此不均何也予對曰天事本無度
推曆者無以寓其數乃以日所行分天為三
百六十五度有奇日平行三百六十五日有餘而一暮天故以一日為
也一度既分之必有物記之然後可窺而數於
是以度度之星記之循黃道日之所行一暮
當者止二十八宿星而已度如傘擦當度謂正當傘擦上者故
車蓋二十八弓以象二十八宿則如渾儀奏議所謂度不可見者星也日月五星之
八謂之舍舍所以挈度所以生數也今所謂距度星者是也非不欲均也黃道所由當度
之星止有此而已

按中興志所載王奕之說即沈括之說也
王沈二公不知其孰先孰後孰倡孰襲然

王說詳而明沈說簡而當故不嫌並著之
云

文獻通考卷之二百七十九

文獻通攷卷之二百八十

鄱陽馬端臨貴與著

十二次度數

晉天文志十二次班固取三統曆十二次配十二野其言最詳又有費直說周易蔡邕月令章句所言頗有先後魏太史令陳卓更言郡國所入宿度今附而次之

中興天文志王奕按星本無次古昔黃帝因日月所會而為之名耳帝王世紀一度二千九百三十二里分為十二次一次三十度三十分度之十四周天積一百七萬九百一十三里經三十五萬六

千九百七十一里三統曆詳矣然帝王世紀費直
周易蔡邕月令又與三統殊少或差一二度多或
五六度何也是行也每歲有差則日月所會之次
分度亦異此言十二次所以不同也

自軫十二度至氐四度為壽星於辰在辰鄭之分
野屬兗州費直周易分野壽星起軫七度
蔡邕月令章句壽星起軫六度

自氐五度至尾九度為大火於辰在卯宋之分野
屬豫州費直起氐十一度
蔡邕起亢八度

自尾十度至南斗十一度為析木於辰在寅燕之
分野屬幽州費直起尾九度
蔡邕起尾四度

自南斗十二度至須女七度為星紀於辰在丑吳
越之分野屬揚州費直起斗十六度
蔡邕起斗十六度

自須女八度至危十五度為玄枵於辰在子齊之

分野屬青州費直起危十四度
蔡邕起危十度

自危十六度至奎四度為諏訾於辰在亥衛之分
野屬并州費直起危十四度
蔡邕起危十度

自奎五度至胃六度為降婁於辰在戌魯之分野
屬徐州費直起奎二度
蔡邕起奎八度

自胃七度至畢十一度為大梁於辰在酉趙之分
野屬冀州費直起婁十度
蔡邕起胃一度

自畢十二度至東井十五度為實沈於辰在申魏
之分野屬益州費直起畢九度
蔡邕起畢六度

自東井十六度至柳八度為鶉首於辰在未秦之
分野屬雍州費直起井十二度
蔡邕起井十度

自柳九度至張十六度為鶉火於辰在午周之分

野屬三河費直起柳三五度

自張十七度至軫十一度為鶉尾於辰在巳楚之

分野屬荊州費直起張十三度

州郡躔次 陳卓范蠡鬼谷先生張良諸葛亮譙

周京房張衡並云

角元氏鄭兗州

東郡入角一度 東平任城山陰入角六度

泰山入角十二度 濟北陳留入元五度

濟陰入氏一度 東平入氏七度

房心宋豫州

穎川入房一度 汝南入房二度

沛郡入房四度 梁國入房五度

淮陽入心一度 魯國入心三度

楚國入房四度

尾箕燕幽州

涼州入箕中十度 上谷入尾一度

漁陽入尾三度 右北平入尾七度

西河上郡北地遼西東入尾十度

涿郡入尾十六度 渤海入箕一度

樂浪入箕三度 玄菟入箕六度

廣陽入箕九度

斗牽牛須女吳越揚州

九江入斗一度 廬江入斗六度

豫章入斗十度

丹陽入斗十六度

會稽入牛一度

臨淮入牛四度

廣陵入牛八度

泗水入女一度

六安入女六度

虛危齊青州

齊國入虛六度

北海入虛九度

濟南入危一度

樂安入危四度

東萊入危九度

平原入危十一度

菑川入危十四度

營室東壁衛并州

安定入營室一度

天水入營室八度

隴西入營室四度

酒泉入營室十一度

張掖入營室十二度

武都入東壁一度

金城入東壁四度

武威入東壁六度

燉煌入東壁八度

奎婁胃魯徐州

東海入奎一度

琅琊入奎六度

高密入婁一度

城陽入婁九度

膠東入胃一度

昂畢趙冀州

魏郡入昂一度

鉅鹿入昂三度

常山入昂五度

廣平入昂七度

中山入昂八度

清河入昂九度

信都入畢三度

趙郡入畢八度

安平入畢四度

河間入畢十度

真定入畢十三度

冀參魏益州

廣漢入冀一度

越雋入冀三度

蜀郡入冀一度

犍為入參三度

牂牁入參五度

巴郡入參八度

漢中入參九度

益州入參七度

東井輿鬼秦雍州

雲中入東井一度

定襄入東井八度

鴈門入東井十六度

代郡入東井廿八度

太原入東井廿九度

上黨入輿鬼二度

柳七星張周三輔

弘農入柳一度

河南入七星三度

河東入張一度

河內入張九度

翼軫楚荊州

南陽入翼六度

南郡入翼十度

江夏入翼十二度

零陵入軫十一度

桂陽入軫六度

武陵入軫十度

長沙入軫十六度

容齋洪氏隨筆曰十二國分野上屬二十八宿其為義多不然前輩固有論之者矣其甚不可曉者莫如晉天文志謂自危至奎為媿訾於辰在亥衛之分野也屬并州且衛本受封於河內商虛後徙楚丘河內乃冀州所部

漢屬司隸其他邑皆在東郡屬兗州於并州
了不相干而并州之下所列郡名乃安定天
水隴西酒泉張掖諸郡目係涼州耳又謂自
畢至東井為實沈於辰在申魏之分野也屬
益州且魏分晉地得河內河東數十縣於益
州亦不相干而雍州為秦其下乃列雲中定
襄鴈門代太原上黨諸郡蓋又自屬并州及
幽州耳謬亂如此而出於李淳風之手豈非
蔽於天而不知地乎

天漢起沒

天河亦一名天漢起自東方箕尾間遂乃分為南
北道南經傳說入魚淵開籥戴弁鳴河鼓北經龜

宿貫箕邊次絡斗魁冒左旗又合南道天津湄二
道相合西南行分夾匏瓜絡入星杵畔造父騰蛇
精王良附路閣道平登此太陵泛天船直到卷舌
又南征五車駕向北河南東井水位入吾驂水位
過了東南游經次南河向闕丘天狗天紀與天稷
七星南畔天河沒

天漢起東方經箕尾之間謂之天河亦謂之漢
津乃分為二道其南經傳說魚天籥天弁河鼓
其北經龜貫箕下次絡南斗魁左旗至天津下
而合南道乃西南行又分夾匏瓜絡入星杵造
父騰蛇王良附路閣道北端太陵天船卷舌而
南行絡五車經北河之南入東井水位而東南

行絡南河闕丘天狗天紀天稷在七星南而沒
張衡云津漢者金之氣也其占曰水漢中星多
則水少則旱
中興天文志石氏云天漢蓋天一所生凝毓而
成者天所以為東南西北襟帶之限也天下河
漢之源蓋出於此故河漢者亦地所以為東南
西北之限也漢張氏云八極之維徑二億三萬
二千三百里南北則短減千里東西則廣增千
里自地至天半於八極則地之深亦如之唐表
氏云以是觀之天漢起東北而止西南其脩徑
可知矣

七曜

日月

隋天文志日循黃道東行一日一夜行一度三百
六十五日有奇而周天行東陸謂之春行南陸謂
之夏行西陸謂之秋行北陸謂之冬行以成陰陽
寒暑之節是故傳云日為太陽之精主生養恩德
人君之象也又人君有瑕必露其隱以告示焉故
日月行有道之國則光明人君吉昌百姓安寧日
變色有軍軍破無軍喪侯王其君無德其臣亂國
則日赤無光日失色所臨之國不昌日晝昏行人
無影到暮不止者上刑急下人不聊生不出一年
有大水日晝昏烏鳥羣鳴國失政日中烏見主不
明為政亂國有白衣會日中有黑子黑氣乍三乍

五臣廢其主日食陰侵陽臣掩君之象有亡國有
死君有大水日食見星有殺君天下分裂王者修
德以禳之

月者陰之精也其形圓其質清日光照之則見其
明日光所不照則謂之魄故月望之日日月相望
人居其間盡觀其明故形圓也二弦之日日照其
側人觀其傍故半明半魄也晦朔之日日照其表
人在其裏故不見也其行有遲疾其極遲則日行
十二度強極疾則日行十四度半強遲則漸疾疾
極漸遲二十七日半強而遲疾一終矣又月行之
道斜帶黃道十三日有奇在黃道表又十三日有
奇在黃道裏表裏極遠者去黃道六度二十七日

有奇陰陽一終張衡云對日之衡其大如日日光
不照謂之闇虛闇虛逢月則月食值星則星亡今
曆家月望行黃道則值闇虛矣值闇虛有表裏深
淺故食有南北多少月為太陰之精以之配日女
主之象也以之比德刑罰之義列之朝廷諸侯大
臣之類故君明則月行依度臣執權則月行失道
大臣用事兵刑失理則月行乍南乍北女主外戚
擅權則或進或退月變色將有殃月晝明姦邪並
作君臣爭明女主失行陰國兵強中國饑天下謀
僭數月重見國以亂亡

張衡靈憲曰懸象著明莫大乎日月其徑當天
周七百三十六分之一地廣二百四十二分之

一日者陽精之宗積而成鳥象鳥而有三趾陽之類其數奇月者陰精之宗積而成獸象兔陰之類其數耦其後有馮焉者羿請無死之藥於西王母恒娥竊之以奔月將往枚筮之於有黃有黃占之曰吉翩翩歸妹獨將西行逢天晦芒母驚母恐後且大昌恒娥遂託身於月是為蟾蠍夫日譬猶火月譬猶水火則外光水則含景故月光生於日之所照魄生於日之所蔽當日則光盈就日則光盡也衆星被耀因水轉光當日之衝光常不合者蔽於他也是謂闇虛在星星微月過則食日之薄地其明也繇暗視明明無所屈是以望之若火方於中天天地同明繇

明瞻暗暗還自奪故望之若水火當夜而揚光在晝則不明也月之於夜與日同而差微星則不然強弱之差也

日月行道

漢天文志日有中道月有九行中道者黃道一曰光道光道北至東井去北極近南至牽牛去北極遠東至角西至婁去極中夏至至於東井北近極故晷短立八尺之表而晷景長尺五寸八分冬至至於牽牛遠極故晷長立八尺之表而晷景長丈三尺一寸四分春秋分日至婁角去極中而晷中立八尺之表而晷景長七尺三寸六分此日其去極遠近之差晷景長短之制也去極遠近難知要

以晷景晷景者所以知日之南北也日陽也陽用
事則日進而北晝進而長陽勝故為溫暑陰用事
則日退而南晝退而短陰勝故為涼寒也故日進
為暑退為寒若日之南北失節晷過而常寒退而
短為常燠此寒燠之表也故曰為寒暑一曰晷長
為潦短為旱奢為扶鄭氏曰扶當為蟠魯之間聲如輔輔聲近蟠止不行也蘇林曰景形奢大也晉灼曰扶附也小臣佞媚附近君子之側也扶者邪臣進而
正臣疏君子不足姦人有餘月有九行也黑道二
出黃道北赤道二出黃道南白道二出黃道西青
道二出黃道東立春春分月東從青道立秋秋分
西從白道立冬冬至北從黑道立夏夏至南從赤
道然用之一决房中道青赤出陽道白黑出陰道

若月失節度而妄行出陽道則旱風出陰道則陰
雨凡君行急則日行疾君行緩則日行遲日行不
可指而知也故以二至二分之星為候日東行星
西轉冬至昏奎八度中夏至氏十三度中春分柳
一度中秋分牽牛三度七分中此其正行也日行
疾則星西轉疾事勢然也故過中則疾君行急之
感也不及中則遲君行緩之象也至月行則以晦
朔决之日冬則南夏則北冬至於牽牛夏至於東
井日之所行為中道月五星皆隨之也箕星為風
東北之星也東北地事天位也孟康曰東北陽日故為天位坤在西南紐於陽為地統故為地事也故易曰東北喪朋及巽
在東南為風風陽中之陰大臣之象也箕星軫也

月去中道移而東北入箕若東南入軫則多風西方為雨雨少陰之位也月失中道移而西入畢則多雨故詩云月離于畢俾滂沱矣言多雨也星傳曰日月入畢則將相言以家犯罪者言陰盛也書曰星有好風星有好雨月之從星則以風雨言失中道而東西也故星傳曰月南入牽牛南戒民間疾疫月北入太微出坐北若犯坐則下人謀上一曰月為風雨日為寒溫冬至日南極晷長南不極則溫為害夏至日北極晷短北不極則寒為害故書曰日月之行則有冬有夏也政治變於下日月運於上矣月出房北為雨為陰為亂為兵出房南為旱為天喪水旱至衝而應及五星之變必然之効

也

中興天文志按三統曆日躔與堯典月令不同日行黃道每歲有差故也江默謂歲差者日躔於一歲之間行周天度未及餘分而日已至焉故每歲常有不及之分然歲差古無有其法漢洛下閎雖知太初歷八百年當差一度後人未究其悉也晉虞喜始覺之歷家祖述其說自唐堯至漢自漢至本朝冬至日躔各各不同然後知歲星差之法得天甚密不可廢也然又嘗考歲差諸說不同宋大明歷以四十年差一度失之太過何承天倍其數以百年退一度又反不及惟隋劉焯取二家中數以七十五年退一度

故唐一行詳考三家而知劉焯之為尤近遂以
大衍歷推之乃得八十三年而差一度蓋大衍
分一度為三千四十分其所差之分一歲三十
有六太積至八十三年則差一度又不若本朝
紀元曆以七十八年差一度為最密也即其法
推之慶曆甲申冬至日在斗五度上距唐開元
甲子三百二十一年日差五度蓋唐志開元甲
子日在赤道斗中十度是也開元甲子上距漢
太初元年丁丑八百二十七年日差十度蓋唐
志以開元大衍曆歲差引而退之則太初元年
冬至日在斗二十度是也太初丁丑上距秦莊
襄王元年一百四十五年日差二度冬至日在

斗二十二度蓋月令云日在斗是也秦莊襄王
元年上距堯甲子二千二十八年日差二十八
度冬至日在虛一度日沒而昴中故堯典言日
短星昴也說者不知歲差之法以堯典較之月
令逮于今日不啻差一次求其說而不可得遂
以為節氣有初中之殊又謂古以午為中皆失
之遠矣又曰開禧占測冬至日已在箕宿較之
堯時幾退四十餘度差自漢太初至今已差一
氣有餘而太陽之躔十二次大約中氣前後乃
得本月宮次蓋太陽本日行一度近歲紀元曆
定歲差約退一分四十餘秒蓋太陽日行一度
而微遲緩一年周天而微差積累分秒而躔度

見焉循是以往萬有五千年後將所差半周天
審如是寒暑易位乎以俟治曆者

又曰占天之法以二十八宿為綱維分列四方
南北去極各九十有一度有奇南低而北昂去
地各三十有六度一定不易者名之曰赤道以
日躔半在赤道內半在赤道外出入內外極遠
者皆二十有四度以其行赤道之中者名之曰
黃道凡五緯皆隨日由黃道行惟月之行有九
道四時交會歸於黃道而轉變焉故有青赤黑
白四者之異名夫赤道終古不移則星舍宜無
盈縮矣然自唐一行作大衍曆以儀揆測之得
畢觜參鬼四宿分度與古不同本朝皇祐初日

官周宗以新儀測候與唐一行尤異紹聖二年
清臺以赤道度數有差復命考正惟牛尾室柳
四宿與舊法合其他二十四宿躔度或多或寡
蓋天度之不齊隨古今而變也若夫黃道橫絡
天體列宿躔度自隨歲差而增減中興以來用
統元紀元及乾道淳熙開禧統天會元每一曆
更一黃道其多寡之異有不可勝載者而步占
家亦隨各曆之躔度焉

又曰王奕按渾天說黃道九道厥初本無是因
日行而強名之日行曰黃道者黃色之中也黃
道即中道也日道居中月五星循左右而行故
日道獨謂之黃月行青朱白黑道各兼黃道而

言故又謂之九道也是故月道出入於黃道其最遠者去黃道六度月行黃道之內曰陰歷行黃道之外曰陽歷北為內南為外然漢志謂黃道北至井去極近南至牽牛去極遠東至角西至婁去極中晉葛洪則謂黃道與赤道東交於角西交於奎南至斗北至井唐志又云黃道春分與赤道交於奎秋分交於軫南至斗北至井與漢志殊何也蓋赤道分天之半今古不易黃道本無定體因日行而為之名日之行也每歲有差漢志主太初而言此古今所以不同也又曰按天文志黃道北至東井去北極近南至牽牛去北極遠東至角西至婁去極中立春春

分月從青道立秋秋分月從白道立冬冬至北從黑道立夏夏至南從赤道吳興沈氏云月行黃道之南謂之朱道行黃道之北謂之黑道黃道之東謂之青道黃道之西謂之白道黃道內外谷四并黃道為九日月之行有遲有速難以一術御也故因其合散分為數段每段以一色名之欲以別筭位而已如陳卓於三家星別其色以識之如筭法用赤籌黑籌以別之耳而歷家不知其意遂以為實有九道甚可嗤也沈氏筆談曰或問予以日月之形如九耶如扇也若如九則其相遇豈不相礙予對曰日月之形如丸何以知之以月盈虧可驗也月

本無光猶銀丸日耀之乃光耳光之初生日
在其傍故光側而所見纔如鉤日漸遠則斜
照而光稍滿如一彈丸以粉塗其半側視之
則粉處如鉤對視之則正圓此有以知其如
丸也日月氣也有形而無質故相直而無礙
歲星曰東方春木於人五常仁也五事類也仁虧
類失逆春令傷木氣則罰見歲星歲星盈縮以其
舍命國其所居久其國有德厚五穀豐昌不可伐
其對為衝歲乃有殃歲星安靜中度吉盈縮失次
其國有變不可舉事用兵又曰人主出象也色欲
明光潤澤德合同又曰進退如度姦邪息變色亂
行主無福又主福主大司農主齊吳主司天下

諸侯入君之過主歲五穀赤而角其國昌赤黃而
沉其野大穰張衡云歲星者東方之精蒼帝之子
一名攝提一名重華一名應星一名紀星晉灼曰
太歲在四仲則歲行三宿太歲在四孟四季則歲
行二宿二八十六三四十二而行二十八宿十二歲
而周天

西漢天文志歲星所在國不可伐可以伐人超
舍而前為羸退舍為縮羸其國有兵不復縮其
國有憂其將死國傾敗所去失地所之得地一
曰當居不居國亡所之國昌已居之又東西去
之國凶不可舉事用兵安靜中度吉出入不當
其次必有天祲見其舍也歲星羸而東南

孟康曰五

星東行天西轉歲星晨見東方石氏見彗星甘
氏不出三月廼生彗本類星末類彗長二丈羸
東北石氏見覺星甘氏不出三月廼生天棊本
類星末銳長四尺縮西南孟康曰歲星當伏西
世石氏見機雲如牛韋昭曰機音甘氏不出三
月廼生天槍左右銳長數丈縮西北石氏見槍
雲如馬甘氏不出三月廼生天機本類星末銳
長數丈石氏槍機棊彗異狀其殃一也必有破
國亂君伏死其辜餘殃不盡為旱凶飢暴疾至
日行一尺出二十餘日廼入甘氏其國凶不可
舉事用兵出而易所當之國是受其殃又曰祆
星不出三年其下有軍及失地若國君喪

中興天文志歲星色青比參左肩小於太白

熒惑曰南方夏火禮也視也禮虧視失逆夏令傷
火氣罰見熒惑熒惑法使行無常出則有兵入則
兵散各以舍命國為亂為賤為疾為喪為飢為兵
所居國受殃環繞鉤已芒角動搖變色乍前乍後
乍左乍右其殃愈甚其南丈夫北女子喪周旋止
息乃為死喪寇亂其野亡地其失行而速兵聚而
下順之戰勝又曰熒惑主大鴻臚主死喪主司空
又為司馬主楚吳越以南又司天下羣臣之過司
驕奢亡亂妖孽主歲成敗又曰熒惑不動兵不戰
有誅將其出色赤怒逆行成鉤已戰凶有圍軍鉤
已冇芒角如鋒刃人主無出宮下有伏兵芒大則

人民怒君子遑遑小人浪浪不有亂臣則有大喪
入欺吏吏欺王又為理外則理兵內則理政為天
子之理也故曰雖有明天子必視熒惑所在其入
守犯太微軒轅營室房心主命惡之張衡云熒惑
為執法之星其精為風伯之師或童兒歌謠嬉戲
晉灼曰熒惑常以十月入朝太微受制而出行列
宿司無道出入無常也二歲而周天

中興天文志熒惑色赤比心大星大小類填按
三星之行過有道之分則循軌順行天下義寧
年穀順成過無道之分則犯闔變色為災為兵
曰吉曰凶未有不關於人事者也然五星之變
俱足以致殃熒惑太白為甚而熒惑尤甚蓋熒

惑火也性烈而不常又為執法之官司天下過
失故其應尤為亟也

填星曰中央季夏土信也思心也仁義禮智信
為主貌言視聽以心為政故四星皆失填乃為之
動動而盈侯王不寧縮有軍不復所居之宿國吉
得地及女子有福不可伐去之失地若有女憂居
宿久國福厚易則薄失次而上二三宿曰盈有主
命不成不乃大水失次而下曰縮后歲其歲不復
不乃天裂若地動一曰填為黃帝之德女主之象
主德厚安危存亡之機司天下女主之過又曰天
子之星也天子失信則填星大動張衡云填星者
黃帝之子女主之象也一名地候晉灼曰常以甲

辰之始建斗之歲填行一宿二十八歲而周天
中興天文志填星色黃比參右肩小於辰按唐
孔氏謂五星之行金水日行一度火七百八十
日行星四百一十五度木三百九十八日行星
三十三度惟土三百七十七日行星十二度蓋
土性重厚而舒緩其行最遲故其為變亦少
容齋洪氏隨筆曰世之伎術以五星論命者
大率以火土為惡故有晝忌火星夜忌土之
語土鎮星也行遲每至一宮則二歲四月乃
去以故為災最久然以國家論之則不然符
堅欲南伐歲鎮守斗識者以為不利史記天
官書云五潢五帝居舍火入旱金兵水水宋

均曰不言木土者德星不為害也又云五星
犯北落軍起火金水尤甚木土軍吉又云鎮
星所居國吉未當居而居已去而復還居之
其國得土若當居而不居既已居之又西東
去其國失土其居久其國福厚其居易也
福薄如此則鎮星乃為大福德與木無異豈
非國家休祥所係非民庶可得侔耶

太白曰西方秋金義也言也義虧言失逆秋令傷
金氣罰見太白太白進退以候兵高卑遲速靜躁
見伏用兵皆象之吉其出西方失行夷狄敗出東
方失行中國敗未盡期曰過參天病其對國若經
天天下革人更王是謂亂紀人民流亡晝與日爭

明強國弱小國強女主昌又曰太白主大臣其號
上公也大司馬位謹候此張衡云太白者白帝之
子一名火政一名官星一名明堂一名文表一名
太皞一名終星一名天相一名天浩一名序星一
名梁星一名威星一名大囂一名大爽晉灼曰常
以正月甲寅與熒惑晨出東方二百四十日而入
入四十日又出西方二百四十日而入入三十五
日而復出東方出以寅戌入以丑未一歲而周天
西漢天文志曰日方南太白居其南日方北太
白居其北為羸侯王不寧用兵進吉退凶日方
南太白居其北日方北太白居其南為縮侯王
有憂用兵退吉進凶當出不出當入不入為失

舍不有破軍必有死王之墓有亡國一曰天下
匱兵壅有兵者所當之國大凶當出不出未當
入而入天下匱兵兵在外入未當出而出當入
而不入天下兵起有至破國未當出而出未當
入而入天下舉兵所當之國亡當期而出其國
昌出東為東方入為北方出西為西方入為南
方所居久其國利易其鄉凶蘇林曰疾過也一
說易鄉而出入也
晉灼曰上言出而
易言疾過是也入七日復出將軍戰死入十
日復出相死之入又復出入君惡之已出三日
而復微入三日延復盛出是為栗而伏晉灼曰
栗退也
不進而伏
伏不見也其下國有軍其衆敗將北已入三日
又復微出三日延復盛入其下國有憂帥師雖

衆敵食其糧用其兵虜其帥出西方失其行夷
狄敗出東方失其行中國敗一曰出蚤為月食
晚為天祇及彗星將發於亡道之國太白出而
留桑榆間病其下國晉灼曰行遲而下也正出
舉目平正出桑榆上餘三
也千里上而疾求盡期日過參天病其對國晉灼
分天過其一此太白經天天下革民更主孟康
西戌之間也出東入西而出入東也太白陰星出東當伏東
出東入西而出入東也則星亡晝見午是為亂紀人民流亡晝見與日
上為經天也則星亡晝見午是為亂紀人民流亡晝見與日
爭明強國弱小國強女主昌太白兵象也出而
高用兵深吉淺凶埤淺吉深凶行疾用兵疾吉
遲凶行遲用兵遲吉疾凶角敢戰吉不敢戰凶
擊角所指吉逆之凶進退左右用兵進退左右

吉靜凶園以靜用兵靜吉趨凶出則兵屈入則
兵入象太白吉反之凶凡太白所出所直之辰
其國得其位得其位者戰勝所直之辰順其色
而角者勝其色害者敗晉灼曰鄭色黃而赤蒼
黃敗楚色赤黑小敗燕色太白白比狼赤比心黃
比參右肩青比參左肩黑比奎大星色勝位晉灼
得位也曰有色勝行勝色得度勝有也行得盡勝之
晉灼曰行應天度雖有色得位行盡勝
之行重而色位輕星經傳得字作德
中與天文志太白色白比狼星而大又大於歲
星

辰星曰北方冬水智也聽也智屬聽失逆冬令傷
水氣罰見辰星辰星見則主刑主廷尉主燕趙又

為燕趙代以比宰相之象亦為殺伐之氣戰鬪之象又曰軍於野辰星為偏將之象無軍為刑事和陰陽應効不効其時不和出失其時寒暑失其節邦當大饑當出不出是謂擊卒兵大起在於房心間地動亦曰辰星出入躁疾常主夷狄又曰蠻夷之星也亦主刑法之得失色黃而小地大動光明與月相逮其國大水張衡云辰星一名勾星一名爨星一名伺星晉灼曰常以二月春分見奎婁五月夏至見東井八月秋分見角元十一月冬至見牽牛出以辰戌入以丑未二旬而入晨候之東方夕候之西方一歲而周天

西漢天文志辰星出蚤為月食晚為彗星及天

祇一時不出其時不和四時不出天下大飢失其時而出為當寒反溫當溫反寒與它星遇而

闕天下大亂

晉灼曰辰星彗孛之屬也一曰五星

中興天文志辰星色黑比奎大星小於歲星

凡五星有色大小不同各依其行而順應節色變有類

凡青皆比參左肩赤比心大星黃比參右肩白比狼星黑比奎大星不失本色而應其四時者吉色害其行凶

凡五星所出所行所直之辰其國為得位者歲星目熉熒惑有禮填星有福太白兵強辰星陰陽和所行所直之辰順其色而有角者勝其色害者敗

居實有惠也居居無德也色勝位行勝色行得盡
勝之營室為清廟歲星廟也心為明堂熒惑廟也
南斗為文太室填星廟也元為䟽廟太白廟也七
星為負官辰星廟也五星行至其廟謹候其命
凡五星盈縮失位元精降于地為人歲星降為貴
臣熒惑降為童兒歌謠嬉戲填星降為老人婦女
太白降為壯夫處於林麓辰星降為婦人吉凶之
應隨其象吉

凡五星木與土合為內亂饑與水合為變謀而更
事與火合為饑為旱與金合為白衣之會合鬪國
有內亂野有破軍為水太白在南歲在北名曰牡
年穀大熟太白在北歲星在南年或有或無火與

金合為鑠為喪不可舉事用兵從軍為軍憂離之
軍却出太白陰分宅出其陽偏將戰與土合為憂
主孽與水合為北軍用兵舉事大敗一曰火與水
合為焮不可舉事用兵土與水合為壅沮不可舉
事用兵有覆軍下師一曰為變謀更事必為旱與
金合為疾為白衣會為內兵國亡地與木合國饑
水與金合為變謀為兵憂入太白中而上欲破軍
殺將客勝下出客亡地視旗所指目命破軍環繞
太白若與鬪大戰客勝

凡木火土金與水鬪皆為戰兵不在外皆為內亂
凡同舍為合相陵為鬪二星相近其殃大相遠無
傷七寸目內必之

凡月蝕五星其國亡歲以饑熒惑以亂填以殺太白以強國戰辰以女亂

凡五星八月其野有逐相太白將僂

凡五星所聚其國王天下從歲以義從熒惑以禮從填以重從太白以兵從辰以法各以其事致天下也三星若合是謂驚立絕行其國外內有兵天喪又民改立侯王四星若合是謂太陽其國兵變並起君子憂小人流五星若合是謂易行有德受慶改立王者掩有四方子孫蕃昌亡慮受殃離其國家咸其宗廟百姓離去被滿四方五星皆大其事亦大皆小事亦小

凡五星色其圜白為喪為旱赤中不平為兵為憂

青為水黑為疾疫為多死黃為吉皆角赤犯我城黃地之爭白哭泣聲青有兵憂黑有水五星同色天下偃兵百姓安寧歌儻以行不見災疾五穀蕃昌

凡五星為政緩則不行急則過分逆則占熒惑緩則不入急則不出遠道則占填緩則不還急則過舍逆則占太白緩則不入逆則占辰星緩則不出急則不入非時則占五星不失行則年穀豐昌

凡五星分天之中積于東方中國積于西方外國用兵者利辰星不出太白為客其出太白為主出而與太白不相從及各出方為格野有軍不戰五星為五德之主其行或入黃道裏或出黃道表猶

月行出有陰陽也終出入五常不可以筭數求也
其東行曰順西行曰逆順則疾逆則遲通而率之
終為東行矣不東不西曰留與日相近而不見曰
伏伏與日同度曰合其留行逆順掩合犯法陵變
色芒角凡其所主皆以時政五常五官五事之得
而見其變木火土三星行遲夜半經天其雖皆與
日合度而後順行漸遲追日不及晨見東方行去
日稍遲朝時近中則留留經旦過中則逆行逆行
至夕時近中則又留留而又順先遲漸速以至于
夕伏西方乃更與日合
金水二星行速而不經天自始與日合之後行速
而先日夕見西方去日前稍遠夕時欲近南方則

漸遲遲極則留留而近日則逆行而合日在于日
後晨見東方逆極則留留而後遲遲極去日稍遠
旦時欲近南方則速以追日晨伏于東方復與日
合此五星合見遲速逆順留行之大經也昏旦者
陰陽之大分也南方者太陽之位而天地之經也
七曜行至陽位當天之經則虧具留逆而不居焉
此天之常道也三星經天二星不經天三天兩地
之道也

凡五星見伏留行逆順遲速應曆度者為得其行
政合于常違曆錯度而失路盈縮者為亂行亂行
則為天失彗孛而有亡國革政兵飢喪亂之禍云
古曆五星並順行秦曆始有金火之逆又甘石並

時自有差異漢初測候乃知五星皆有逆行其後相承罕能察至後魏末清河張子信學藝博通尤精曆數因避葛榮亂隱於海島中積三十許年專以渾儀測候日月五星差變之數以筭步之始悟日月交道有表裏遲速五星見伏有感召向背言日行在春分後則遲秋分後則速合朔月在日道懷則日食若在日道外雖交不虧月望值交則虧不問表裏又月行遇木火土金四星向之則速背之則遲五星行四方列宿各有所好惡所居遇其好者則留多行遲見早遇其惡者則留少行速見遲與常數並差少者差至五度多者差至三十許度其辰星之行見伏尤異晨應見在雨水後立夏

前夕應見在處暑後霜降前並不見啓蟄立夏立秋霜降四氣之內晨夕去日前後三十六度內十八度外有木火土金四星者見無者不見後張胃玄劉孝孫劉焯等依此差度為定入交食分及五星定見定行與天密會皆古人所未得也
中興天文志夫二曜二氣之精也五緯五行之精也二曜俱順行五緯獨有退逆何也班氏謂三代盛時天下五緯順軌無逆行者周之末造人紀不脩師旅數起故五緯始失常度而有逆行然則降姬而羸世道趨末星軌遁常亦失其初歟易觀乎人文以察時變故星紀之逆順可以懷然懼矣

數如房宿又有上中下三道焉此其所以易於
陵犯是以清臺每言五星行次黃道所經諸星
占家多不驗凡以此故要諸天人之際可畏有
兆於此有感於彼其出沒顯晦飛流升降疾遲
羸縮進退會散動移轉徙非邈無與於是故
精侵之交明君謹之能遇灾而加懼見祥而滋
傲思其咎謝不敢怠寧王事之當然也善乎太
史公之言曰太上修德其次修政其次修教其
次修禳畏天者擇焉

又曰按五星之變有合有散有犯有守有陵有
曆有闔有羸有縮有食同舍曰合變為妖星曰
散寸以內光芒相及曰犯韋昭謂自下而往觸

之為犯也居其宿曰守相冒而過曰陵韋昭謂
突掩為陵也經之曰曆相擊曰闔又曰離復合
合復離為闔早出曰羸晚出曰縮又失次上二
三宿曰羸失次下二三宿曰縮星月相陵曰食
吉凶各以類應不可誣已然有或不盡如所占
何也曰日月五行俱行黃道不能無侵犯也惟
迫近則殃大遠則毋傷寸以內芒角相及則其
占始應漢志曰近者殃大遠者殃毋傷後之星
史不此之察猥見其差近遂譎張以為變此所
以繁褻不驗

文獻通考卷之二百八十

